



écminchons!



Avri 1984. Mi, Gadrouille, j'ai mn'age éch moè chi : j'écminche ém 5° ènè d'existènche... Éj vo dviserai -ti d'éch picard pèr chi, d'éch picard pèr lo ? "Non !" qu'o disez ! Éd quòè ? O volez in-ne histoère ? Bon ! N'guérinnez point comme o ! N'in vlo in-ne bèle d'histoère, in-ne véritabe...

Y-avoait un coup, à Miéna, au cotè d'Advil-le, in-ne étchipe éd jon-nes gins fin matchès d'foaire du téyate. Ch'étoait in 1979-80. Tout natu-rélmint, iz ont montè des piéches... in picard, qu'iz ont tè persinter din in-ne coupe éd poéyi in Picardie. Autour d'"éch Bleu", iz ont ajincè in-ne tchote étchipe à Adville pour "édviser, con-ter, pi canter in picard in-n'hui", in-ne édvisé qu'al étoait un molé provotchante à ch'momint lo, meume si o n'in rit à mzure, achteure. Ch'étoait l'édvisé éd tous chés nouveaux "picarcantants" poëillus qu'o rincontroait à l'époque.

Émn histoère a s'porsuit d'un eute cotè. Sans connoaite "chés jon-nes éd Miéna", n'in vlo deux, pi troè, pi quate, qui voloait' foaire quique cose in picard, quique cose qui n's'avoait janmoé foait.

In 1975, à chés "Picardisants du Ponthu pi du Vimeu", à Adville, iz étoait'té déjo lo, Florimond, pi Tchot Sé. Dé smainne in smainne, iz alloait' canter, conter din chés villages, éd salle éd fêtes in salle éd cafè, avec chés pu viux, qu'iz ont foait déteinne édsu eux leu brinche éd pér-ler "comme o", leu brinche éd porsuire éch picard, d'él définne.

Ch'est un coup, in rvénant d'Diéppe, rap-port à un pourjet d'chintrale atomique à Pinly, qu'échl idèe al a jarnè. Quòè qu'oz avoème tè foaire au jusse ? O l-lé sérez un eute coup, pété-te... Adon, in rvénant d'Diéppe, iz étoait't à deux in auto : Florimond pi Jean-Luc. Histoère éd passer un momint pi d'vir à quòè qu'éch "site éd Pinly" i rsan-ne édvant qu'i y-euche in-ne chintrale, i vont foaire un piot tour dsu chof falise. Quante o prind chu cmin d'Vassonville, oz arrive

bél é bièn din chov "valleuse" éd Pinly, tout jusse in face d'éch poéyi. Vlo don no deux écolo-gisses in route à rbéyer ch'temps bleu d'juillet. Tout d'un coup, in-ne lubrie : i n-n'o un qui dit à l'eute : "i feuroait foaire un journal tout in picard ! Éd long in bout, a n's'a janmoé foait ! Mi, éj tape, pi ti t'inprimes !". Échl idèe al est lancèe... "Porquòè point, qu'i dit l'eute, foésons l-lé; si o n'él foésons point, a n'sé fro point !". Échl idèe a n'résté point in l'air. I n'y-o mie pu qu'a acater du papieu et pi coésir un boin tite. A tè vite foait, pour un coup. Un viu pourjet, qui n'avoait point abouti durant chés courts-jours, i s'apploait "CH'LANCHRON" pi des lanchrons, tout l'mon-ne i sait ch'qu'est ch'est;

pi ichi, à Pinly, i y-avoait des lanchrons à l'gronnèe. Éch tite il étoait coési, ché sroait don CH'LANCHRON. Ch'est lo qu'l'eute il o dit à ch'preume : "Voais-tu, i feuroait un piot bétail qui s'proumin-ne au long d'chés pages d'éch jornal, a donnroait d'l'unitè. Ti qu'tu sais dessiner tu n'éros point d'mau à l'foaire!" Ch'est comme o qu'oz a pinsè à mi, i n'réstoait pu qu'a m'ba-tiser. In 1979, o fsoait un molé tout partout, él 'cache au gaspi'. Ch'est aladon qu'chés deux rédeux i m'ont applè GADROUILLE (étoait peu éte pire). Seulmint, apreu in-ne telle décision, oz est rcran. A foait qu'a trinè, a trinè in lond-jeur. Finalmint, éch n'est qu'in 1980, éch 8 du moè d'avri, qu'j'ai vnu au monne avec éch liméro 1 dé CH'LANCHRON. In troé jours, à quate, i n-n'ont tirè pi ablutchè 200 éximplères ! In tout piot, o povoait lire édsu ch'couvèrt : "L'01, pour vir".

Quique temps apreu, chés gaztiers iz ont rincontrè chés jeux d'téyate éd Miéna, à Adville, à d'où qu'iz avoait't un spèctaque. Ch'étoait au 25 d'avri 1980. Édpi ch'temps lo, iz ont foait route insanne. Échl association d'"CHÉS AMIS DE CH'LANCHRON" al est nèe, pèr éch jornal officièl d'éch 4 éd moai 1980.

Achteure, i y o in-ne chintrale atomique à Pinly. Achteure, i y o 15 liméros dé CH'LAN-CHRON d'pèrus (oz ons vu !), pi 120 séries d'téyate pi canchons éd foaites "pour in-n'hui", édsous ch'tite éd "CASSIGOUTTE", avec 4 spèctaq-ues éd foaits : 1 pèr ènèe, édpi 1980.

In-n'hui, chés lanchronneux i sont à 25. Éd 200, o tirons ch'jornal à 3 500 éximplères, pi oz ons pèrasanner un mille d'abon-nès. Pi CH'LANCHRON ch'est étou tout chl'ouvrage foait din chés écoles autour d'éch picard. Ch'est coér chés jornèes picardes "CHÉS QUATE ÉCMINS" qui vont rquémincer au moèdeut pour él 3° coup. Et pi ch'est étou télmint pi télmint d'eutes choses qu'a prindroait tout no plache pour qu'o vo disonche toute ichi, in-n'hui. Sans compter tout ch'qu'éz eutes associations picardes i foait't étou, éd leu cotè. O n-n'in réstrons lo pour éch coup chi. Éd trimèsse in trimèsse, porvu qu'o no suiveuche, o sérez ch'rèstant din CH'LANCHRON.

Oz avez volu in-ne histoère ? O l-l'avez yeue. Pour mi, a tè in-ne occasion pour érbéyer un molé pèr derrière. À mzure, a foait plaisi, surtout quante oz a idèe d'aller d'l'avant !

Allez, éj vo tchitte; un eute coup éj vo dirai in-ne eute histoère, pi j'én pérlerai pu d'mi. Seulmint ch'est in-n'hui qu'j'ai mn'age... O m'connaichez miu achteure (pi o povez tojours m'invoéyer sécant cadeaux),

Gadrouille

amitiézmint à tortous,
vo Gadrouille aditè,

CH'LANCHRON : 4 LIMÉROS PÈR AN

Ass. : 8, citè d'chés Cminots 80100 ADVILLE
Abon-nmints : 5, rte éd Bèlloè 80130 BORSÉVILLE
D.L. : 1er Trimèsse 1984

Dirècteur éd gazète : Thierry SÉLLIER
Rédacteu in Chéf : Jacques DULPHY